



KENYATAAN MEDIA

PERKESO-UNITAR LANCAR PUSAT SATELIT MYFUTUREJOBS

PETALING JAYA - Kementerian Sumber Manusia (KSM) menerusi agensinya, **Pertubuhan Keselamatan Sosial (PERKESO)** dan **Universiti Antarabangsa UNITAR (UNITAR)** telah melancarkan sebuah **Pusat Satelit MYFutureJobs** di kampus induk institusi pengajian tinggi swasta (IPTS) tersebut, hari ini.

Penubuhan pusat satelit itu adalah yang **pertama** seumpamanya bagi IPTS di seluruh negara. Pembukaan pusat ini juga akan membantu merealisasikan hasrat kedua-dua agensi untuk memperluas dan memperkasakan penyampaian perkhidmatan pekerjaan di negara ini khususnya kepada golongan pelajar, graduan baharu dan pencari kerja untuk meneroka kerjaya pilihan mereka.

Majlis pelancaran Pusat Satelit MYFutureJobs ini telah disempurnakan oleh **Menteri Sumber Manusia, Datuk Seri M. Saravanan**. Turut hadir, **Naib Canselor Universiti Antarabangsa UNITAR, Prof. Emeritus Tan Sri Dato' Sri Ir. Dr. Sahol Hamid Abu Bakar** dan **Ketua Cawangan Perkhidmatan Pekerjaan PERKESO, Gayathri Vadivel**.

“Kerjasama ini akan mewujudkan satu ekosistem pasaran buruh yang lebih efisien yang akan memberi manfaat besar, bukan sahaja kepada para pelajar dan graduan, malah kepada para pencari kerja dalam kalangan masyarakat setempat sebagai calon yang dicari majikan untuk mengisi jawatan kosong.

“KSM menerusi PERKESO juga telah berjaya melaksanakan penempatan pekerjaan kepada seramai **269,704** pencari kerja menerusi Portal MYFutureJobs untuk sepanjang tahun 2020. Sehingga **13 Disember 2021**, sebanyak **450,083** peluang pekerjaan yang

masih aktif ditawarkan kepada lebih **833,529** pencari kerja yang berdaftar di MYFutureJobs,” kata Datuk Seri M. Saravanan.

Sementara itu, Naib Canselor Universiti Antarabangsa UNITAR, Prof Emeritus Tan Sri Dato’ Sri Ir. Dr. Sahol Hamid Abu Bakar berkata, universiti tersebut berbangga menjadi IPTS pertama di Malaysia yang menubuhkan Pusat Satelit MYFutureJobs di kampus induknya.

“Ini adalah usaha penting dalam situasi yang tidak menentu ini. UNITAR dan PERKESO, di bawah KSM akan bekerjasama dan menggembeng tenaga untuk meningkatkan kebolehpasaran dalam kalangan graduan UNITAR dan kumpulan yang terjejas. Kami yakin Pusat Satelit MYFutureJobs ini mampu menyediakan peluang pekerjaan yang luas dan bermanfaat,” katanya di majlis pelancaran Pusat Satelit tersebut.

Pusat Satelit MYFutureJobs menawarkan pelbagai perkhidmatan pekerjaan kepada para pencari kerja atau pengunjung seperti perkhidmatan pemprofilan pencari kerja, temu duga terbuka, khidmat nasihat kerjaya melalui ‘*one to one approach*’, pendaftaran percuma di Portal MYFutureJobs, hebahan jawatan kosong dan sebagainya.

PERKESO dan UNITAR percaya bahawa kewujudan pusat satelit itu bukan sahaja akan memudahkan laluan kerjaya seseorang, malah ia juga akan terus menjadi rujukan kepada sesiapa yang mencari maklumat berkaitan pasaran buruh dan peluang pekerjaan yang ditawarkan di Portal MYFutureJobs.

18 DISEMBER 2021

MENGENAI PERTUBUHAN KESELAMATAN SOSIAL (PERKESO)

Pertubuhan Keselamatan Sosial telah ditubuhkan sebagai sebuah Jabatan Kerajaan di bawah Kementerian Sumber Manusia bagi menyediakan perlindungan keselamatan sosial kepada golongan pekerja di bawah Akta Keselamatan Sosial Pekerja 1969 (Akta 4) dan Peraturan-Peraturan (Am) Keselamatan Sosial Pekerja 1971, Akta Keselamatan Sosial Pekerjaan Sendiri 2017 (Akta 789) dan Akta Sistem Insurans Pekerjaan 2017 (Akta 800). Konsep Perlindungan Keselamatan Sosial PERKESO adalah berteraskan konsep tanggungjawab Bersama menerusi sumber tekumpul, perkongsian risiko dan penggantian pendapatan.

Sejak pandemik melanda negara pada tahun 2020, PERKESO telah dipertanggungjawabkan untuk melaksanakan pelbagai inisiatif Kerajaan di bawah beberapa Pakej Rangsangan Kerajaan seperti PRIHATIN, PENJANA, KITA PRIATIN, BELANJAWAN 2021 PERMAI, PEMERKASA dan PEMERKASA+. PERKESO kini sedang melaksanakan bantuan Kerajaan yang telah ditambahbaik di bawah Pakej Perlindungan Rakyat dan Pemulihan Ekonomi (PEMULIH) menerusi program seperti Program Subsidi Upah (PSU 4.0), PenjanaKerjaya 3.0, KerjayaGig dan SIP Prihatin 2.0.

MENGENAI UNIVERSITI ANTARABANGSA UNITAR

Universiti Antarabangsa UNITAR ditubuhkan pada tahun 1997 sebagai universiti maya pertama di Asia Tenggara dan antara universiti swasta terawal di negara ini. Ia merupakan institusi pertama di Asia yang diberi penarafan QS 5-Bintang bagi kategori Pembelajaran Dalam Talian. Sejalan dengan Matlamat Pembangunan Lestari oleh Pertubuhan Bangsa-Bangsa Bersatu, UNITAR melalui ekosistem pembelajaran holistik dan inovatif menyediakan tawaran program yang komprehensif untuk semua peringkat sosioekonomi di samping melahirkan warganegara yang bekerjaya dan berkeusahawanan global.

Ia bukan sekadar bertujuan untuk menyediakan laluan pembelajaran untuk para pelajar memperoleh set kemahiran yang relevan, tetapi melalui prinsip C.A.R.E – kaedah pembelajaran Kolaboratif, Adaptif, Reflektif dan Keusahawanan, UNITAR memupuk para pelajarnya mengenai kesedaran sendiri terhadap bakat dan kebolehan mereka, serta menyemai dalam diri mereka keperluan terhadap tanggungjawab sosial di samping membentuk mereka untuk menjadi warganegara yang lebih baik.

Program-program UNITAR ditawarkan di 13 lokasi, termasuk kampus induknya di Kelana Jaya. Ia mempunyai jumlah pendaftaran lebih daripada 5,000 pelajar melalui 40 program homegrown yang terdiri daripada peringkat Asasi (Foundation), Diploma dan Ijazah Sarjana Muda sehingga ke program Sarjana dan Doktor Falsafah (Doctorate). Untuk memenuhi keperluan industri semasa, UNITAR juga menyediakan lebih daripada 50 program pensijilan profesional. Dengan Pengakreditasi Pembelajaran Berasaskan Pengalaman Terdahulu bagi Tujuan Penganugerahan Kredit (APEL), golongan profesional yang bekerja boleh menyambung pengajian dengan pilihan untuk mengurangkan tempoh masa program.

UNITAR berasa bangga kerana mempunyai barisan akademik yang komited di pelbagai fakulti dan sekolah. Bahagian akademik ini terdiri daripada Fakulti Perniagaan & Teknologi, Fakulti Pendidikan & Kemanusiaan, Sekolah Seni Kulineri dan Sekolah Seni Media & Reka Bentuk. Sejak penubuhannya, UNITAR telah memulakan kaedah pembelajaran inovatif di mana teknologi telah diaplikasikan secara signifikan, namun ia tidak bertujuan untuk menggantikan hubungan sesama manusia. Ianya diterapkan untuk menawarkan pendidikan berkualiti yang kompetitif dalam pengajaran konvensional dan pembelajaran secara maya sehingga ke hari ini, memenuhi keperluan pendidikan abad ke-21.

HUBUNGI KAMI

PERKESO

Izad Hj Raya

Ketua Pegawai Komunikasi

No. Telefon: +60 12 6377 890

E-mel: amyzaddin.raya@perkeso.gov.my

Laman Web: <https://www.perkeso.gov.my>

UNITAR International University

Marc Kevin Natusch

Komunikasi Korporat & Perhubungan Awam

No. Telefon: +60 11 3976 1673

E-mel: marc.kevin@unitar.my

Laman Web: <https://www.unitar.my>